



**Resolución do 23 de abril de 2015 (Día Mundial do Libro e dos Dereitos de Autor), da Dirección Xeral de Centros e Recursos Humanos, pola que se recoñece o autor galego máis lido polos clubs de lectura do ámbito educativo, no curso precedente, mediante o PREMIO DOS CLUBS DE LECTURA 2015. Esta iniciativa inscríbese no programa para o fomento da lectura en centros educativos, Hora de Ler, integrado no Plan LÍA de Bibliotecas Escolares (Lectura, Información e Aprendizaxe) da Consellería de Cultura, Educación e Ordenación Universitaria.**

A Consellería de Cultura, Educación e Ordenación Universitaria vén desenvolvendo, desde o ano 2007, unha iniciativa para o fomento da lectura destinada ao alumnado de ensino secundario, bacharelato, formación profesional e ensinanzas de réxime especial a través dunha convocatoria anual que facilita o funcionamento de clubs de lectura nos centros de titularidade pública que acollen estas ensinanzas. Esta acción intégrase no programa Hora de ler para o fomento da lectura nos centros educativos, incluído á súa vez, no Plan LÍA de Bibliotecas Escolares (Lectura, Información e Aprendizaxe).

Neste curso 2014/2015 funcionan clubs de lectura, co apoio da consellería, en 228 centros de ensino secundario e postobrigatorio. Unha boa parte destes clubs (o 62% do total) acolle varios grupos de lectura, dependendo do nivel de estudos, os intereses dos lectores ou as temáticas de lectura. Cómpre salientar que as reunións dos grupos de lectura realizanse fóra dos horarios lectivos (tempos de lecer ou horario extraescolar). Neste curso participan directamente desta iniciativa algo máis de nove mil cincocentos lectores e lectoras, entre profesorado, alumnado e familias, pois, ademais, un 26% destes clubs integran un grupo de lectura de adultos, do que forman parte profesorado, persoal non docente e nais/pais da comunidade educativa; mesmo existen grupos mixtos nos que participan lectores adultos xunto cos mozos e mozas.

Os clubs de lectura son, na actualidade, grupos de dinamización a prol da lectura nas comunidades educativas das que forman parte. Son espazos de convivencia e de educación cidadá, pero tamén ámbitos de aprendizaxe non formal que contribúen á adquisición de competencias clave, especialmente as do ámbito da comunicación e da información. Estes grupos son os primeiros en incorporarse á lectura dixital co uso dos novos dispositivos de lectura, e integran as tecnoloxías da comunicación e da información de forma natural nas súas actividades (vídeos, blogues, redes sociais, booktrailers...). Paulatinamente, os clubs de lectura foron creando vínculos de colaboración e realizando actividades conxuntas que axudan a tecer unha rede de lectores por toda a xeografía galega.

Nos últimos cursos (trala lectura das memorias dos clubs que participaron nas convocatorias desta consellería), recollérónse os títulos lidos polos diferentes clubs de lectura e déronse a coñecer os autores e os libros más lidos, cada ano académico, a través dos espazos web e os materiais do programa de bibliotecas escolares da consellería. Estes listados dos autores ou dos libros más lidos teñen concitado o interese das lectoras e dos lectores, pero tamén doutros axentes do mundo do libro e da lectura en Galicia.



Profesoras e profesores que coordinan estes grupos de lectura amosaron o seu interese por recoñecer a aqueles autores e autoras que, cos seus libros, axudan á construcción de lectoras e lectores nestas etapas da adolescencia e a mocidade que, no ámbito da lectura, están consideradas como etapas de risco de abandono, ao ampliarse o abano de estímulos e intereses. Uns creadores comprometidos coa lingua que achegan a materia prima coa que os clubs de lectura poden contribuír á extensión da lectura en galego.

Por todo o anterior, a Dirección Xeral de Centros e Recursos Humanos, desde a que se coordinan as intervencións da Consellería de Cultura, Educación e Ordenación Universitaria en materia de bibliotecas escolares e fomento da lectura, co gallo da conmemoración do Día Mundial do Libro 2015, dispón:

#### Apartado 1: Obxecto.

1. Recoñecer o labor das autoras e dos autores galegos que facilitan cos seus libros a función do profesorado como mediadores de lectura e que concitan o interese das lectoras e dos lectores que participan nos clubs de lectura. Con esta finalidade, establecese o Premio dos Clubs de Lectura que, cada ano, se outorgará ao autor ou á autora de obra en galego que resultase seleccionado polo maior número de clubs de lectura, mediante a lectura de un ou varios títulos, no curso precedente.
2. Como nos anos anteriores, trala lectura das memorias correspondentes á actividade dos clubs en cada curso escolar, publicarase a relación de autores e autoras más lidos e concederase o Premio dos Clubs de Lectura a aquel autor galego ou aquela autora galega que ocupe a primeira posición na relación dos creadores más lidos.
3. O galardón seralle entregado no transcurso da Xornada dos Clubs de Lectura, na que anualmente se reúne o profesorado que coordina estes clubs de lectura dos centros públicos de ensino secundario de Galicia.
4. O Premio dos Clubs de Lectura poderá entregarse unha soa vez a un autor ou autora. No caso de que o primeiro creador da relación resultante nun curso xa tivese recibido o premio, este seralle concedido ao autor ou autora seguinte na relación.
5. Desde o seguimento deste programa poderáse decidir o estímulo a un xénero concreto, diferente á narrativa, como poesía, teatro, cómic ou ensaio, o que se comunicaría a comezos de cada curso para que os clubs de lectura contén coa información pertinente.

#### Apartado 2: Concesión do Premio dos Clubs de Lectura 2015

Na Xornada dos Clubs de Lectura que se celebrará o vindeiro 5 de Xuño en Santiago de Compostela, concederáselle o Premio dos Clubs de Lectura 2015 ao escritor **Agustín Fernández Paz**, por ser o autor galego más lido polos clubs de lectura durante o pasado curso 2013/2014.<sup>1</sup>

<sup>1</sup> <http://lerenmancomun.blogspot.com.es/2014/11/as-40-autoras-e-autores-mais-lidos-nos.html>



XUNTA DE GALICIA

CONSELLERÍA DE CULTURA, EDUCACIÓN  
E ORDENACIÓN UNIVERSITARIA

Edificio Administrativo San Caetano, s/n  
15781 Santiago de Compostela  
[www.edu.xunta.es](http://www.edu.xunta.es)

galicia

Comunicarase ao escritor esta concesión e convidaráselle a participar na Xornada dos Clubs de Lectura onde recibirá a homenaxe do profesorado asistente e, por eles representados, de todos os lectores e lectoras participantes nos clubs de lectura dos centros de ensino secundario de Galicia.

Santiago de Compostela, 23 de abril de 2015  
O DIRECTOR XERAL DE CENTROS E RECURSOS HUMANOS

  
José Manuel Pinal Rodríguez